

## Su Basoni

Forti, scidu e corriazzu  
Si presentat su basoni,  
Derettu in su seddazzu  
Cun s'ista o a peddoni.

No ddi mancant fuettu, spronis  
Cosingius cun gambalis,  
Sogas e funis a tronis  
Imperat oqualis.

De carrizza fiat liudu  
Pistau de sa sedda,  
Casi sempri solu, mudu  
A trottu cun sa ghianedda.

Dd'iat domada cun affannus  
Aresti, m'arrespundiat  
Frischiddosa de tres annus  
Sa chi issu sezziat.

A su murtinu crastau  
Su bastu ddi carrigada,  
Su strexu iat preparau  
Provvista po sa cidada.

Bonettu calau in fronti  
Cun betula e mocilla,  
Impunat s'egu'a monti  
No ddi tremiat 'na cilla.

Dd'iant arrecumandau  
Cuaddus de bend'in pranu  
Trexenta bonu mercau  
Portu e in Campidanu.

De is cuaddus su tallu  
Impunat po atobiai  
Mancu su tempus malu  
Ddu firmat de ddus circai.

S'imbussat cun dd'unu saccu  
De orbaci po s'arreparai  
S'apprigat sfiniu straccu  
Abetendi a scampiai.

In mesu sa temporada  
Ddus intendiat annigrendi,  
Scaresciat sa sfacchinada  
Su ddus agatai pascendi.

Solu in dd'unu serragu  
In dd'accorrat prus de centu,  
Nci ddus calat in su tragu  
Conca a bidda a stentu.

Sunti cuaddus arrusu  
Baiu, ghiani, murtinu,  
Ndi domat po dogna usu  
Coscia, carru, molinu.

Nd'i imperant po treulai  
Po calessi e po festa,  
Is prus fortis a tragai  
Ddus poniant in foresta.

Is prus bellus de bisura  
Accoppiant sa pariglia,  
Po pregius e figura  
Curriant in sa Sartiglia.

Cun sa soga fiat abistu  
Sezziat med'a sa nua,  
Ndi domat cun su crabistu  
A funi e frenu cun prua.

De tempus in Sardinnia  
Est stetia post'a parti,  
Ndi bantat puru Sinnia  
Maistus de cuss'arti.